

Ա Շ Խ Ա Տ Ա Կ Ա Ր Գ
ԿԱՅՈՒՆ ԶԱՐԳԱՑՄԱՆ ԾՐԱԳՐԻ ԻՐԱԿԱՆԱՑՄԱՆ ԱՇԽԱՏԱՆՔՆԵՐԸ
ՀԱՄԱԿԱՐԳՈՂ ԽՈՐՀՐԴԻ

I. ԸՆԴՀԱՆՈՒՐ ԴՐՈՒՑԹՆԵՐ

1. Սույն աշխատակարգով սահմանվում է Կայուն զարգացման ծրագրի իրականացման աշխատանքները համակարգող խորհրդի (այսուհետ՝ խորհուրդ) գործունեության կարգը:
2. Խորհրդի հիմնական նպատակը Կայուն զարգացման ծրագրի (այսուհետ՝ ծրագիր) իրականացման աշխատանքների համակարգումն է և աշխատանքների նկատմամբ վերահսկողության իրականացումը:

II. ԽՈՐՀՐԴԻ ԳՈՐԾՈՒՆԵՈՒԹՅԱՆ ՈԼՈՐՏԸ

3. Խորհրդի խնդիրներն են՝
 1. ծրագրի և Կայուն զարգացման ծրագրի սոցիալական գործընկերության համաձայնագրի (այսուհետ՝ համաձայնագիր) դրույթների իրականացումը, ինչպես նաև դրանց մոնիթորինգի և գնահատման աշխատանքների համակարգումը.
 2. ծրագրի իրականացման մասին տարեկան հաշվետվությունների մշակման աշխատանքների համակարգումը.
 3. ծրագրի ճշգրտման, վերանայման, ինչպես նաև ծրագրի ներքո ռազմավարական և մարտավարական այլ փաստաթղթերի մշակման ու իրականացման աշխատանքների համակարգումը և Հայաստանի Հանրապետության կառավարություն համապատասխան առաջարկություններ ներկայացնելը.
 4. ծրագրի իրականացման տարեկան և միջնաժամկետ միջոցառումների ծրագրերի մշակման աշխատանքների համակարգումը.
 5. ծրագրի իրականացման գործընթացում միջազգային համագործակցության համակարգումը.
 6. ծրագրի աշխատանքային խմբի գործունեության ղեկավարումը.
 7. ծրագրի աշխատանքային խմբի աշխատակարգի և անհատական կազմի հաստատումը:

III. ԽՈՐՀՐԴԻ ԱՇԽԱՏԱՆՔՆԵՐԻ ԿԱԶՄԱԿԵՐՊՈՒՄԸ

4. Խորհուրդն իր աշխատանքները կազմակերպում է նիստերի միջոցով, որոնք գումարվում են առնվազն յուրաքանչյուր վեց ամիսը մեկ անգամ, ինչպես նաև արտահերթ նիստերի միջոցով՝ սույն աշխատակարգի 6րդ կետին համապատասխան:
5. Խորհրդի նիստերը հրավիրում է խորհրդի նախագահը:
6. Խորհուրդն իր արտահերթ նիստերը գումարում է ծրագրի և համաձայնագրի դրույթների իրականացման աշխատանքների ընթացքում առաջացած հարցերի ու

խնդիրների լուծման համար՝ խորհրդի նախագահի նախաձեռնությամբ կամ խորհրդի անդամների առնվազն 1/3-ի առաջարկությամբ:

7. Խորհրդի նիստն իրավագոր է, եթե դրան մասնակցում է խորհրդի կազմի առնվազն 2/3-ը:

8. Խորհրդի որոշումներն ընդունվում են ձայների պարզ մեծամասնությամբ: Ձայների հավասարության դեպքում նիստը վարողի ձայնը վճռորոշ է:

9. Խորհրդի այն անդամը, ով համաձայն չէ խորհրդի ընդունած որոշմանը, ներկայացնում է իր գրավոր հատուկ կարծիքը, որը կցվում է որոշմանը:

10. Խորհրդի նիստի օրակարգը տրամադրվում է խորհրդի անդամներին և սույն աշխատակարգի 14րդ կետով նախատեսված անձանց՝ նիստից առնվազն 2 օր առաջ:

11. Հարցի քննարկման ընթացքում լրացուցիչ նյութեր կամ տեղեկատվություն պահանջվելու դեպքում հարցի քննարկումը կարող է տեղափոխվել խորհրդի հաջորդ նիստ:

12. Յուրաքանչյուր նիստ սկսվում է նիստի օրակարգի հաստատմամբ և նախորդ նիստում ընդունված որոշումների կատարման ընթացքի մասին տեղեկատվությամբ:

13. Խորհրդի աշխատանքներին խորհրդակցական ձայնի իրավունքով մասնակցում են ծրագրի աշխատանքային խմբի ղեկավարը և խորհրդի քարտուղարության ներկայացուցիչը:

14. Խորհրդի աշխատանքներին խորհրդակցական ձայնի իրավունքով մշտապես հրավիրվում են Համաշխարհային բանկի հայաստանյան գրասենյակի ներկայացուցիչը, Արժույթի միջազգային հիմնադրամի հայաստանյան գրասենյակի ներկայացուցիչը, Հայաստանում Եվրահանձնաժողովի պատվիրակության ներկայացուցիչը, Միավորված ազգերի կազմակերպության հայաստանյան գրասենյակի ներկայացուցիչը, Գերմանիայի տեխնիկական համագործակցության ընկերության ներկայացուցիչը:

15. Խորհրդի նիստերին կարող են մասնակցել հրավիրված պետական պաշտոնյաներ, փորձագետներ, զանգվածային լրատվության միջոցների և այլ շահագրգիռ կազմակերպությունների ներկայացուցիչներ:

IV. ԽՈՐՀՐԴԻ ՆԱԽԱԳԱՀԸ

16. Խորհրդի նախագահը՝

1. վարում է խորհրդի նիստերը.
2. ստորագրում է խորհրդի որոշումները.
3. իր բացակայության դեպքում խորհրդի անդամներից մեկին հանձնարարում է վարել խորհրդի նիստերը.
4. հավանության է արժանացնում խորհրդի նիստի օրակարգը.

5. ներկայացնում է խորհուրդը Հայաստանի Հանրապետության կառավարությունում կամ այլ կազմակերպություններում կամ խորհրդի անդամներին հանձնարարում է խնդիրները ներկայացնել Հայաստանի Հանրապետության կառավարությունում կամ միջազգային կազմակերպությունների հետ իրականացնել քննարկումներ:

V. ԽՈՐՀՐԴԻ ԱՆԴԱՄՆԵՐԸ

17. Խորհրդի անդամն իր պաշտոնից ազատվելու պահից կորցնում է խորհրդին անդամակցությունը: Նրա փոխարեն խորհրդին անդամակցում է նույն պաշտոնն ստանձնած անձը՝ բացառությամբ հասարակական կազմակերպությունների խմբերի ներկայացուցիչների: Խորհրդի անդամ հանդիսացող հասարակական կազմակերպությունների խմբի ներկայացուցիչը փոփոխվում է քաղաքացիական համագործակցության ցանցի խորհրդի որոշմամբ:

18. Խորհրդի նիստին խորհրդի անդամի մասնակցության անհնարինության դեպքում խորհրդի նիստին մասնակցում է խորհրդի տվյալ անդամի լիազորած ներկայացուցիչը:

19. Խորհրդի նիստերից խորհրդի անդամի կամ նրա լիազորած ներկայացուցչի երկու և ավելի անգամ բացակայությունը հիմք է խորհրդի տվյալ անդամի փոփոխման համար:

VI. ԽՈՐՀՐԴԻ ՔԱՐՏՈՒՂԱՐՈՒԹՅՈՒՆԸ

20. Խորհրդի քարտուղարությունը Հայաստանի Հանրապետության Էկոնոմիկայի նախարարության աշխատակազմի համապատասխան ստորաբաժանումն է:

21. Խորհրդի քարտուղարությունը՝

1. նախապատրաստում է նիստի օրակարգին վերաբերող համապատասխան նյութերն ու կազմակերպում նյութերի տրամադրումը խորհրդի անդամներին.
2. ապահովում է խորհրդի նիստի որոշումների նախագծերի կազմումը.
3. հետևում է խորհրդի որոշումների կատարմանը և խորհրդի նիստում զեկուցում դրանց կատարման ընթացքի մասին.
4. վարում է խորհրդի աշխատանքների հետ կապված գործավարությունը.
5. գրանցում է խորհրդի անդամների ներկայացրած գրավոր հատուկ կարծիքները.
6. կազմակերպում է խորհրդի որոշումների տրամադրումը խորհրդի անդամներին և համապատասխան կազմակերպություններին: